

JP Nacionalni park „Una“ d.o.o. Bihać

Ured direktora

Ul. Gazi-husrev begova br. 15

77 000 B I H A Ć

Broj: 01-3570/25

Bihać, 31.12.2025. godine

Na temelju člana 40. i člana 43. Statuta JP Nacionalni park „Una“, d.o.o. Bihać, a u vezi sa članom 9. stav 2. tačka. 3. Zakona o Nacionalnom parku „Una“ („Službene novine Federacije BiH“ broj: 44/08) i odredbi članova 16.-19. Pravilnika o unutarnjem redu u Nacionalnom parku Una („Službene novine Federacije BiH“ broj: 4/25), v.d. direktora d o n o s i

O D L U K U

o uvjetima i načinu organizacije sportsko - rekreativnog ribolova
na vodenim tokovima u području Nacionalnog parka „Una“ za 2026. godinu

Član 1.

(Predmet)

Ovom Odlukom uređuju se pitanja od značaja za organizaciju sportsko – rekreativnog ribolova na vodenim tokovima u području Nacionalnog parka „Una“ Bihać za 2026. godinu.

Član 2.

(Dozvoljeni načini ribolova)

Dozvoljeni načini ribolova (tehnika ribolova, alati i mamci) na vodenim tokovima u području Nacionalnog parka „Una“ u uspostavljenim revirima su:

1. Ribolov mušičarenjem (fly fishing) po principu „ulovi i pusti“ sa upotrebom udice bez kontra kuke,
2. Ribolov upotrebom vodene kuglice (tzv. Wasserkugle) sa najviše 3 (tri) umjetna mamca-suhe mušice,
3. Ribolov varaličarenjem sa blinkerom i drugim umjetnim mamcima tzv. Špinjanjem.

Član 3.

(Uspostavljeni ribolovni reviri na vodenim tokovima)

Organizacija sportsko - rekreativnog ribolova tokom 2026. godine može se vršiti u 6 (šest) osnovnih revira i 1 (jedan) posebni revir, a to su:

1. Revir br. 1 „Martin Brod“ namijenjen isključivo za mušičarenje (tzv. fly fishing) uz upotrebu udice bez kontra kuke, a revir obuhvata područje na rijeci Unac koje počinje 100 (stotinu)

metara uzvodno od mosta kod manastira Rmanj, te se nastavlja nizvodno rijekom Unac do lokaliteta Sastavci gdje se Unac ulijeva u rijeku Unu i dalje niz vodotok rijeke Une do tačke nizvodno od zaseoka Palučci na rijeci Uni. Sveukupna dužina ovog revira je 7,1 km.

- Poseban revir „Unac“ nalazi se u sklopu revira br. 1. „Martin Brod“ te se proteže od tačke koja se nalazi 100 m uzvodno od mosta na rijeci Unac, nizvodno do Sastavaka tj. ušća Unca u Unu, te dalje nizvodno kratkim dijelom toka rijeke Une do tzv. Srušenog mosta gdje Posebni revir završava. Za Posebni revir „Unac“ određuje se posebna cijena ribolovne dozvole utvrđena u članu 8. ove Odluke.
- 2. Revir br. 1A „Gečet“ je kombinirani revir namijenjen za ribolov mušičarenjem, kao i metodom upotrebe vodene kugle (tzv. wasserkugle) sa 3 (tri) suhe mušice ili/i ribolov varaličarenjem sa tzv. blinkerom ili drugim umjetnim mamcima tzv. špinjanjem. Ovaj revir obuhvata područje od tačke nizvodno od zaseoka Palučci na rijeci Uni, nizvodno do slapa koji se nalazi 150 (stotinupedeset) metara uzvodno od velikog mosta u naseljenom mjestu Kulen Vakuf. Dužina revira je 3,4 km.
- 3. Revir br. 1B „Kulen Vakuf“ namijenjen samo za mušičarenje (fly fishing). Obuhvata područje na rijeci Uni od slapa koji se nalazi 150 (stotinupedeset) metara uzvodno od velikog mosta u naseljenom mjestu Kulen Vakuf, te se proteže nizvodno kroz naseljeno mjesto Kulen Vakuf do mosta koji preko rijeke Une vodi do naseljenih mjesta Klisa i Ostrovica. Sveukupna dužina ovog revira je 1,5 km.
- 4. Ribolovni revir br. 2 „Klisa – Čelije“ namijenjen za ribolov upotrebom vodene kugle (tzv. wasserkugle) sa 3 (tri) suhe mušice ili ribolov varaličarenjem sa blinkerom ili drugim umjetnim mamcima tzv. špinjanjem. Obuhvata područje na rijeci Uni od tačke tzv. „Oćukine kuće“ (od zone A stalne zabrane), nizvodno rijekom Unom do nekadašnjeg visećeg mosta kod željezničke stanice Štrbački buk. Dužina revira je 14,5 km.
- 5. Ribolovni revir br. 4 „Dvoslap“ namijenjen za ribolov upotrebom vodene kugle (tzv. wasserkugle) sa 3 (tri) suhe mušice ili ribolov varaličarenjem sa blinkerom ili drugim umjetnim mamcima tkz. špinjanjem. Revir obuhvata područje na rijeci Uni od Bisovačkog mosta (željeznički most-granica sa Republikom Hrvatskom) nizvodno tokom rijeke Une do slapa Dvoslap (gornji slap). Dužina revira je 3,3 km.
- 6. Ribolovni revir br. 5 „Očigrije“ namijenjen za ribolov upotrebom vodene kugle (tzv. wasserkugle) sa 3 (tri) suhe mušice ili ribolov varaličarenjem sa blinkerom ili drugim umjetnim mamcima tkz. špinjanjem. Obuhvata područje na rijeci Uni uzvodno od Martin Broda, tačnije od drvenog mosta na lokalitetu Zamršten (nalazi se uzvodno od željezničkog mosta) uzvodno tokom rijeke Une do tačke na rijeci koja je u ravni sa raskrsnicom za Očigrije tj. podvožnjakom ispod željezničke pruge. Dužina revira je 1,7 km.

Član 4.

(Stalne zabrane ribolova na vodenim tokovima)

U ostalom dijelu vodenih tokova na području Nacionalnog parka „Una“ u 2026. godini uspostavlja se 7 (sedam) zona stalne zabrane ribolova bilo koje vrste i to su:

- a) A-zona, koja obuhvata područje od mosta koji vodi za naseljeno mjesto Klisa nizvodno tokom rijeke Une u dužini od 500 (petsto) metara do lokaliteta tzv. „Oćukina kuća“.

- b) B-zona, koja obuhvata područje od nekadašnjeg visećeg mosta kod željezničke stanice Štrbački buk nizvodno do lokaliteta Bisovački most (željeznički most uzvodno od Troslapa).
- c) C-zona u dužini 400 (četiristotine) metara. Počinje od tačke koju čini sjeverna granica Nacionalnog parka "Una" na sedrenoj adi nizvodno od Dvoslapa, te se proteže uzvodno 400 m do gornjeg slapa na Dvoslapu.
- d) D-zona, koja obuhvata područje koje počinje 100 (stotinu) metara uzvodno od mosta kod manastira Rmanj na rijeci Unac i proteže se uzvodno do južne granice Nacionalnog parka „Una“ u pravcu općine Drvar-lokalitet Berek.
- e) E-zona, koja obuhvata područje od lokaliteta Sastavci gdje se rijeka Unac ulijeva u rijeku Unu u naseljenom mjestu Martin Brod, uzvodno vodotokom rijeke Une do drvenog mosta na lokalitetu Zamršten (nalazi se uzvodno od željezničkog mosta).
- f) F-zona obuhvata područje od ribolovnog revira "Očigrije" odnosno tačke na rijeci Uni koja je u ravni sa raskrsnicom za selo Očigrije tj. podvožnjakom ispod željezničke pruge, uzvodno do ušća rječice Krke u rijeku Unu, te nastavlja uzvodno cijelim tokom rječice Krka do njenog izvora,
- g) G-zona koja obuhvata tok rječice Ostrovića od njenog izvora do ušća gdje se ulijeva u rijeku Unu do (dužine 850 m).

Član 5.

(Označavanje revira)

Utvrđeni reviri i zone zabrane biti će označeni vidljivo istaknutim tablama na granicama revira i zona stalne zabrane ribolova.

Član 6.

(Mogućnost dnevnog izlova ribe)

- a) U ribolovnim revirima br. 1 „Martin Brod i br. 1B "Kulen Vakuf" gdje se sportsko-rekreativni ribolov obavlja isključivo metodom mušičarenja (fly fishing) nije dozvoljeno izlovljavanje ribe i ribolov vrši isključivo po principu "ulovi i pusti". Ovo pravilo vrijedi za sve vrste riba koja se lovi pa tako i za alohtonu vrstu kalifornijsku pastrmku.
- b) U ribolovnim revirima br. 2 „Klisa – Čelije“, br. 4 "Dvoslap" i br. 5 „Očigrije“ gdje se sportsko-rekreativni ribolov obavlja isključivo metodom korištenja vodene kugle (tzv. wasserkugle) sa 3 (tri) suhe mušice (umjetna mamca) ili varaličarenjem, dozvoljava se:
 - sportskom ribolovcu da dnevno izlovi maksimalno 2 (dva) primjerka ribe koja obitava u području revira i koja po primjerku ne može biti manja od 30 (trideset) cm i veća od 40 (četdeset) cm za primjerke pastrmke i lipljena. Primjerke koji su manji od 30 cm ili veći od 40 cm, sportski ribolovac je obavezan vratiti u vodu.
- c) U ribolovnom reviru br. 1A "Gečet" uspostavlja se poseban režim ribolova na način da se isti koristi kombinirano: od ponedjeljka do četvrtka ribolov u reviru je dozvoljen isključivo metodom mušičarenja (fly fishing) po principu "ulovi i pusti", a od petka do nedjelje ribolov

u reviru je dozvoljen isključivo metodom korištenja vodene kugle (tzv. wasserkugle) sa 3 (tri) suhe mušice (umjetna mamca) ili varaličarenjem.

Član 7. **(Režim ribolova)**

U reviru br. 1 “Martin Brod” gdje se sportsko-rekreativni ribolov obavlja samo metodom mušičarenja (flyfishing) u 2026. godini uspostavlja se režim ribolova u vremenskom periodu:

- od 01. maja do 31. oktobra - svaki dan

Posebni revir “Unac” (dužine 1,0 km) koji je u sastavu revira br. 1 obuhvata područje na rijeci Unac koje počinje 100 (stotinu) metara uzvodno od mosta kod manastira Rmanj, te se nastavlja nizvodno rijekom Unac do lokaliteta Sastavci gdje se Unac ulijeva u rijeku Unu i kratko nastavlja rijekom Una do tzv. Srušenog mosta, gdje se u 2026. godini uspostavlja režim ribolova u vremenskom periodu:

- od 01. marta do 31. oktobra – svaki dan

U reviru br. 1A “Gečet” gdje se sportsko-rekreativni ribolov se vrši kombinovano, u 2026. godini uspostavlja se režim ribolova u vremenskom periodu:

- od 01. maja do 31. oktobra za potočnu i kalifornijsku pastrmku i lipljen i to petkom, subotom i nedjeljom isključivo metodom vodene kugle (tzv. wasserkugle) sa 3 (tri) suhe mušice (umjetna mamca) ili/i varaličarenjem,
- od 01. maja do 31. oktobra i to ponedjeljkom, utorkom, srijedom i četvrtkom isključivo metodom mušičarenja (flyfishing).

U reviru br. 1B “Kulen Vakuf” gdje se sportsko-rekreativni ribolov obavlja samo metodom mušičarenja (fly fishing), u 2026. godini uspostavlja se režim ribolova u vremenskom periodu:

- od 01. maja do 31. oktobra - svaki dan

U reviru br. 2 „Klisa-Ćelije“ gdje se sportsko-rekreativni ribolov obavlja metodom korištenja vodene kugle (Wasserkugle) sa 3 (tri) suhe mušice (umjetna mamca) ili varaličarenjem u 2026. godini uspostavlja se režim ribolova u vremenskom periodu:

- od 01. marta do 30. septembra za potočnu pastrmku
- od 01. marta do 31. oktobra za kalifornijsku pastrmku
- od 01. maja do 31. oktobra za lipljen

i to u dane petkom, subotom i nedjeljom, a ostalim danima ribolov je zabranjen.

U reviru br. 4 „Dvoslap“ gdje se sportsko-rekreativni ribolov obavlja metodom korištenja vodene kugle (Wasserkugle) sa 3 (tri) suhe mušice (umjetna mamca) ili varaličarenjem u 2026. godini uspostavlja se režim ribolova u vremenskom periodu:

- od 01. marta do 30. septembra za potočnu pastrmku
- od 01. marta do 31. oktobra za kalifornijsku pastrmku
- od 01. maja do 31. oktobra za lipljen

i to u dane petkom, subotom i nedjeljom, a ostalim danima ribolov je zabranjen.

U reviru br. 5 „Očigrije“ gdje se sportsko-rekreativni ribolov obavlja metodom korištenja vodene kugle (tzv. wasserkugle) sa 3 (tri) suhe mušice ili ribolov varaličarenjem sa blinkerom ili drugim umjetnim mamcima tzv. špinjanjem u 2026. godini uspostavlja se režim ribolova u vremenskom periodu:

- od 01. marta do 30. septembra za potočnu pastrmku
- od 01. marta do 31. oktobra za kalifornijsku pastrmku
- od 01. maja do 31. oktobra za lipljen

i to u dane petkom, subotom i nedjeljom, a ostalim danima ribolov je zabranjen.

Član 8.

(Vrste i cijene ribolovnih dozvola)

- (1) U revirima br. 1 „Martin Brod“, br. 1B „Kulen Vakuf“ br. 1A „Gečet“ (kombinovani) u kojima se sportsko-rekreativni ribolov vrši metodom mušičarenja (fly fishing), za 2026. godinu utvrđuju se slijedeće vrste ribolovnih dozvola:
 - dnevna dozvola za državljane Bosne i Hercegovine članove ribolovnih udruženja u Bosni i Hercegovini, uz dokaz o redovnom članstvu i ličnu kartu/pasoš,
 - dnevna dozvola za turiste sportske ribolovce,
 - trodnevna dozvola za turiste - sportske ribolovce,
 - petodnevna dozvola za turiste - sportske ribolovce.
- (2) Izuzetak je posebni revir „Unac“ koji se nalazi u sastavu revira br. 1 „Martin Brod“, a za koji se visina novčane naknade utvrđuje za slijedeće vrste ribolovnih dozvola:
 - dnevna dozvola za sve sportske ribolovce,
 - trodnevna dozvola za sve sportske ribolovce,
 - petodnevna dozvola za sve sportske ribolovce.
- (3) U revirima br. 1A „Gečet“ (kombinovani), br. 2 „Klisa-Ćelije“, br. 4 „Dvoslap“ i br. 5 „Očigrije“ u kojima se sportsko-rekreativni ribolov vrši metodom korištenja vodene kugle (tzv. wasserkugle) sa 3 (tri) suhe mušice (umjetna mamca) ili/i varaličarenjem, utvrđuju se slijedeće vrste ribolovnih dozvola:
 - dnevna dozvola za ribolovce državljane BIH (varaličarenje i mušičarenje), članove udruženja sportskih ribolovaca u Bosni i Hercegovini, uz dokaz o redovnom članstvu i ličnu kartu/pasoš,
 - dnevna dozvola za turiste – sportske ribolovce,
 - trodnevna dozvola za turiste - sportske ribolovce,
 - godišnja dozvola (30 dnevnih izlazaka na vodu u toku ribolovne sezone) za državljane BIH članove udruženja sportskih ribolovaca u Bosni i Hercegovini, uz dokaz o redovnom članstvu i ličnu kartu/pasoš.
 - godišnja dozvola (30 dnevnih izlazaka na vodu u toku ribolovne sezone) za državljane BIH članove udruženja sportskih ribolovaca u Bosni i Hercegovini uz dokaz o redovnom članstvu i ličnu kartu/pasoš, za slijedeće kategorije:
 - Ratni vojni invalidi uz predočenje dokumenta kojim dokazuju status,
 - Penzioneri uz predočenje dokumenta kojim dokazuju status,

- Porodice šehida i poginulih boraca uz predočenje dokumenta kojim dokazuju status,
 - Demobilisani borci koji su radno sposobni i koji se nalaze na evidenciji nezaposlenih JU "Zavod za zapošljavanje USK-a" uz predočenje dokaza o statusu demobilisanog borca i nezaposlene osobe,
- godišnja dozvola (30 dnevnih izlazaka na vodu u toku ribolovne sezone) za domicilno stanovištvo u području Nacionalnog parka "Una" uz predočenje dokaza o mjestu prebivališta (CIPS) ili vlasništvu/suvlasništvu nad nekretninom u području Nacionalnog parka "Una".
 - godišnja dozvola (30 dnevnih izlazaka na vodu u toku ribolovne sezone) za domicilno stanovništvo iz područja Nacionalnog parka "Una" uz predočenje dokaza o mjestu prebivališta (CIPS) ili vlasništvu/suvlasništvu nad nekretninom u području Nacionalnog parka "Una" i to:
 - Ratni vojni invalidi uz predočenje dokumenta kojim dokazuju status,
 - Penzioneri uz predočenje dokumenta kojim dokazuju status,
 - Porodice šehida i poginulih boraca uz predočenje dokumenta kojim dokazuju status,
 - Demobilisani borci koji su radno sposobni i koji se nalaze na evidenciji nezaposlenih JU "Zavod za zapošljavanje USK-a" uz predočenje dokaza o statusu demobilisanog borca i nezaposlene osobe,
 - počasni članovi USR „Una“ starosti preko 65 (šezdesetpet) godina uz predočenje lične karte i original dokumenata kojim dokazuju status počasnog člana.
- (4) Visina naknade za sve vrste ribolovnih dozvola utvrđuje se Cjenovnikom JP Nacionalni park „Una“ d.o.o. Bihać za 2026. godinu.

Član 9.

(Prodaja ribolovnih dozvola)

Prodaja ribolovnih dozvola se vrši na više lokacija kako slijedi:

- Godišnje ribolovne dozvole se prodaju isključivo u upravi JP Nacionalni park „Una“ d.o.o.,
- Dnevne, trodnevne i petodnevne ribolovne dozvole se prodaju na info tački u Kulen Vakufu (Unska bb), na ulazu br. 5 „Milančev buk“ u Martin Brodu i u Bihaću d.o.o. (objekat Turističko informativnog centra u ulici 5. Korpusa - preko puta Pošte).

Član 10.

(Sankcije)

- (1) Kršenje odredbi ove Odluke i Pravila o uvjetima i načinu organizacije sportsko – rekreativnog ribolova na vodenim tokovima u području Nacionalnog parka „Una“, pored pokretanja prekršajnog postupka prema počiniocu kod nadležnih tijela, povlači i mogućnost izricanja sankcije od strane nadležnih tijela JP Nacionalni park "Una" d.o.o. Bihać prema prekršiocima, koja se ogleda u privremenoj ili trajnoj zabrani ribolova na području Nacionalnog parka "Una" Bihać, bez mogućnosti povrata novčanih sredstva uplaćenih za kupovinu ribolovne dozvole.

- (2) Sankcija prema prekršiocu koja se ogleda u privremenoj zabrani do 12 mjeseci koju donosi Uprava ili trajnoj zabrani ribolova na vodotocima u Nacionalnom parku Una koju donosi Nadzorni odbor na prijedlog Uprave.
- (3) Lica koja nadzornici JP Nacionalni park "Una" d.o.o. Bihać zateknu u kršenju propisa o ribolovu na vodenim tokovima u području Nacionalnog parka „Una“, moguće je izricanje trajne zabrane ribolova na vodenim tokovima u području Nacionalnog parka "Una" od strane Uprave JP Nacionalni park "Una" d.o.o. Bihać u slučajevima kada:
- obavljaju sportski ribolov bez ribolovne dozvole,
 - obavljaju sportski ribolov zabranjenim sredstvima i alatima,
 - love i uništavaju riblju mlađ i primjerke veće biološke vrijednosti u vrijeme lovostaja;
 - love ribu harpunom, ostima i drugim zabranjenim sredstvima i alatima, vatrenim oružjem ili hemijskim i drugim sredstvima koja ubijaju i truju ili omamljuju ribu;
 - love ribu neposredno rukom;
 - ometaju postavljanje znakova kojima se obilježava ribolovno područje, prirodno riblje mrijestilište, ribnjak ili ribolovna voda za ribolov pod posebnim uslovima i mjestima na kojima je ribolov zabranjen, kao i vrše oštećenje i premještanje znakova;
 - ribolove noću.

Član 11.

Lica koja su u toku 2025. godine sankcionisana zbog kršenja ribolovnih propisa u ribolovnim revirima Nacionalnog parka "Una", zabranjuje se ribolov u revirima NP Una na period od godinu dana odnosno ta lica neće moći ishodovati ribolovne dozvole za 2026. godinu.

Član 12.

Sastavni dio ove Odluke čine Pravila o uvjetima i načinu organizacije sportsko – rekreativnog ribolova na vodenim tokovima u području Nacionalnog parka „Una“ za 2026. godinu.

Član 13.

Ova Odluka stupa na snagu danom donošenja, a primjenjivaće se za kalendarsku 2026. godinu.

V. D. direktora

Alen Zulić

JP Nacionalni park „Una“ d.o.o. Bihać

Ured direktora

Ul. Gazi-husrev begova br. 15

77 000 B I H A Ć

Broj: 01-3570-1/25

Bihać, 31.12.2025. godine

Na temelju člana 39. i člana 41. Statuta JP Nacionalni park „Una“, d.o.o. Bihać, a u vezi sa članom 9. stav 2. tačka 1. Zakona o Nacionalnom parku „Una“ („Službene novine Federacije BiH“, broj: 44/08) i odredbi članova 16.-19. Pravilnika o unutarnjem redu u Nacionalnom parku Una („Službene novine Federacije BiH“ broj: 4/25), v.d. direktora d o n o s i

P R A V I L A

o uvjetima i načinu organizacije sportsko-rekreativnog ribolova na vodenim tokovima
u području Nacionalnog parka „Una“ za 2026. godinu

Član 1.

Pravna i fizička lica koja organizuju sportsko-rekreativni ribolov na vodenim tokovima u području Nacionalnog parka „Una“ dužna su:

- ishoditi registraciju pravnog subjekta koje je registrirano da vrši usluge iz oblasti turizma,
- otkupiti ribolovne dozvole od JP Nacionalni park „Una“ d.o.o. Bihać sukladno članu 9. Odluke o uvjetima i načinu organizacije sportsko - rekreativnog ribolova na vodenim tokovima u području Nacionalnog parka „Una“ za 2026. godinu (u daljem tekstu Odluka),
- svakom posjetitelju-ribolovcu izdati odgovarajuću dozvolu JP Nacionalni park „Una“ d.o.o. Bihać za obavljanje sportsko-rekreativnog ribolova u području Nacionalnog parka „Una“,
- upoznati posjetitelje-ribolovce sa pravilima sportskog ribolova koja vrijede u području Nacionalnog parka „Una“ kao i općim pravilima ponašanja u zaštićenom području (informativno-poučne table, putem interneta i nadzornici usmenim putem),
- osigurati transport i prihvat ljudi i vozila na način da se ne narušava priroda.

Član 2.

Opća pravila za sve ribolovne revire:

- izlazak na vodu je dozvoljen samo uz posjedovanje ribolovne dozvole izdane od strane JP Nacionalni park „Una“ d.o.o. Bihać na prodajnim mjestima,
- ribolov iz vode je zabranjen sa rancem ili nekom drugom vrstom torbe koji se moraju odložiti na obalu rijeke,

- nije dozvoljeno vršiti ribolov iz unske lađe ili bilo kojeg drugog plovila, kao i sa mostova koji se nalaze na vodenim tokovima u području Nacionalnog parka „Una“,
- strogo je zabranjena upotreba živih mamaca i kruha,
- ribolov počinje u 7,00 h, a završava:
 - od 26. februara do 01. maja u 18 h,
 - od 01. maja do 30. augusta u 21 h,
 - od 01. septembra do 03. oktobra u 19 h,
- ribolov čekanjem (tzv. „čeka“) nije dopušten,
- nije dozvoljeno loženje otvorene vatre na području Nacionalnog parka osim na mjestima koja su određena i označena za tu namjenu,
- strogo je zabranjeno odlaganje smeća u i uz vodene tokove i na druga mjesta u prirodi koja nisu određena i označena za ovu namjenu,
- nije dozvoljeno loviti i uznemiravati divlje životinje, ubirati šumske plodove i biljke koje obitavaju i imaju stanište na području Nacionalnog parka „Una“,
- nije dozvoljeno parkirati vozila na mjesta koja nisu određena i označena za tu namjenu,
- zabranjeno je kampirati na području Nacionalnog parka „Una“ osim na mjestima koja su određena i označena za tu namjenu,
- djeca starosti do 13 godina ne plaćaju ribolovnu dozvolu, pod uvjetom da su tokom ribolova nadzirana od strane punoljetne osobe koja ima ribolovnu dozvolu izdanu od strane JP Nacionalni park „Una“ d.o.o. Bihać, te ta osoba odgovara za postupke maloljetnog ribolovca kojeg nadzire. Riba koju ulovi ribolovac do 13 godina starosti računa se u dozvoljenu kvotu ribolovne dozvole punoljetne osobe koja ga nadzire u skladu sa važećim propisima,
- nadzornici Nacionalnog parka „Una“ prilikom kontrole ribolovac ovlašteni su zatražiti da im isti predoči ribolovnu dozvolu i lični dokument, kao i izvršiti pregled opreme, ulovljene ribe, ranca ili drugih torbi, vozila i dr.,
- svi sportski ribolovci po završetku ribolova dužni su se odjaviti kod Nadzorničke službe JP Nacionalni park „Una“ d.o.o. Bihać iz razloga evidencije broja komada ulovljene ribe, kontrole veličine i vrste riba.

Posebna pravila za ribolov mušičarenjem (fly fishing-om):

- nije dozvoljeno koristiti drugi pribor osim jednog štapa za mušičarenje/flyfishing,
- nije dozvoljeno korištenje udice sa kontra kukom,
- zabranjeno je postavljanje otežanja ispred ili iza udice,
- obavezna je upotreba meredova (bez kvržica),
- ribolov se vrši samo po principu „ulovi i pusti“.

Posebna pravila za ribolov sa vodenom kuglom (tzv. Wasserkugle) i tri suhe muhe ili varaličarenjem:

- nije dozvoljeno koristiti drugi pribor osim vodene loptice (tzv. Wasserkugle) sa tri suhe mušice tj. umjetne mamce uobičajene za ovu vrstu ribolova, kao i umjetne mamce uobičajene kod ribolova varaličarenjem,
- ribolov se vrši samo određenim danima tokom ribolovne sezone, a to su: petak, subota i nedjelja.

Član 3.

Nadzor nad provođenjem Odluke o uvjetima i načinu organizacije sportsko - rekreativnog ribolova na vodenim tokovima u području Nacionalnog parka „Una“ za 2026. godinu i ovih Pravila, vršiti će Nadzornička služba JP Nacionalni parka „Una“ d.o.o. Bihać sukladno Uredbi o organizaciji, načinu rada i ovlastima nadzorničke službe zaštite prirode („Službene novine Federacije BiH“ broj: 14/16). Inspekcijski nadzor nad provođenjem određaba Odluke, Pravila i ostalih propisa donesenih na temelju Zakona o Nacionalnom parku „Una“ („Službene novine Federacije BiH“ broj: 44/08), Zakona o zaštiti prirode Federacije BiH („Službene novine Federacije BiH“ broj: 66/13) i drugih propisa, vršiti će Federalni i drugi nadležni inspektori.

Član 4.

Kršenjem određaba Pravila o uvjetima i načinu organizacije sportsko – rekreativnog ribolova na vodenim tokovima u području Nacionalnog parka „Una“ za 2025. godinu, prekršilac će biti sankcionisan kako je propisano Odlukom i Pravilima o uvjetima i načinu organizacije sportsko - rekreativnog ribolova na vodenim tokovima u području Nacionalnog parka „Una“ za 2026. godinu i drugim važećim propisima.

Član 5.

Ova Pravila stupaju na snagu danom donošenja, a primjenjivati će se za kalendarsku 2026. godinu.

V. D. direktora

Alen Zulić